

Kolumna visokog predstavnika: Sudite o kandidatima prema tome kako oni služe građanima



Piše: Valentin Inzko

U nedjelju će građani u cijeloj Bosni i Hercegovini glasati na opštinskim izborima i odlučivati o tome koga žele da vodi njihovu opštinu u sljedeće četiri godine. To je velika odgovornost, jer će uticati na svakodnevne živote.

Ovi izbori su važni. Oni pružaju priliku građanima da razmisle o trenutnom opštinskom vođstvu i njihovim protivkandidatima za tu funkciju. Birači treba da donesu odluku na osnovu toga ko može zadovoljiti njihove potrebe kada je riječ o pitanjima koja su im najvažnija, bilo da je riječ o dječijim igralištima, uličnoj rasvjeti, odvozu smeća ili bilo čemu drugom. Moj lični izbor kao birača na opštinskim izborima uvijek su bili vrijedni, pragmatični političari i političke stranke koje razumiju da treba da živimo u vremenu saradnje i integracije, a ne izolacije.

To je posebno važno u Bosni i Hercegovini, pogotovo u multietničkim, povratničkim sredinama. Bošnjaci, Hrvati, Srbi i Ostali imaju dugu istoriju zajedničkog razumijevanja, solidarnosti i saradnje. Svima je bilo bolje kada su radili zajedno. Nacionalizam i podjele ne stavljaju hranu na sto.

Nažalost, nemaju svi građani pravo glasa na ovim izborima. Građanima Mostara je još jednom uskraćeno pravo da izaberu ko

će biti na vlasti u njihovom gradu. To je sramotno, a građani zaslužuju bolje. Bez obzira koliko bi neki političari željeli kriviti međunarodnu zajednicu, jasno je da za ovu situaciju odgovornost snose vodeće političke stranke u Mostaru. One moraju što prije pronaći rješenje, kako bi Mostarci mogli iskoristiti svoja demokratska prava.

Izbori koji se održavaju ove nedjelje se odnose na praktičnu politiku. Izbornim rezultatima se mijenja situacija, a to znači da izlazak na izbore i glasanje takođe nešto mijenja. Ukoliko građani na opštinskom nivou izaberu lidere koji su u stanju da identifikuju generalne oblasti i teme koje zanimaju njihovo izborno tijelo te ponude realna rješenja za uobičajene probleme, to će pokazati da su promjene nabolje moguće u ovoj zemlji i da promjene počinju od baze prema višim nivoima.

Ako ste bili iskreno zadovoljni kako su neki kandidati rješavali vaše konkretne komunalne i lokalne probleme i potrebe, koji su vašu opštinu napravili ljepšom, boljom i sigurnijom, opštinom za djecu i starije generacije, opštinom bez korupcije, onda glasajte opet za njih.

Ako to nije slučaj, temeljno razmislite o alternativama. Na taj način, razmišljate konkretno o svojoj budućnosti. A ta budućnost je vaša najvažnija briga, vaše najvažnije pitanje!

Apelujem na građane BiH da u nedjelju izađu na izbore i glasaju! Direktno i pozitivno utičite na situaciju u vašoj lokalnoj zajednici i u vašoj zemlji.

Izbore će u nedjelju pratiti i 3000 građana u svojstvu nestranačkih posmatrača. Iskoristio bih ovu priliku da pozovem političke subjekte da s njima aktivno sarađuju.